

## Արևածագ

Մակերես՝ 8.6 կմ<sup>2</sup>

Բնակչություն՝ 842

Գյուղ Ալավերդի տարածաշրջանում, Ալավերդի քաղաքից 14կմ հարավ, մարզկենտրոնից գտնվում է 36կմ հեռավորության վրա: Նախկինում ունեցել է Ղաչաղան, Ուզուն լարա օյուն, Ուզունլար Ներքին, Ուզունլար Նոր անվանումները: Արեւածագ է վերանվանվել 1976 թ-ին:

Գյուղը տեղադրված է Ձորագետի ստորին հոսանքում, սարավանդի վրա՝ ծովի մակարդակից 1270մ բարձրության վրա: Ունի վարդագույն ֆելզիտի պաշարներ, որոնք ունեն արդյունաբերական նշանակություն: Կլիման բարեխառն լեռնային է, տեւական, ցուրտ ձմեռներով: Ամեն տարի հաստատվում է կայուն ձնածածկույթ: Ամառները տաք են, համեմատաբար խոնավ: Տարեկան թափվում են 600-700մմ մթնոլորտային տեղումներ: Ագրոկլիմայական տեսակետից ընկած է ինտենսիվ ոռոգման գոտում:

Գյուղի արեւմտյան կողմում՝ Ձորագետի ձախ ափին՝ բարձր լեռան վրա պահպանվում են հին քարաշեն աշտարակի հիմքերը, որն ունեցել է պաշտպանական նշանակություն: Բացի այդ այստեղ հնագիտական պեղումների ժամանակ հայտնաբերվել են մ.թ.ա. 11-10-րդ դդ դամբարանադաշտ: 1873 թ-ին գյուղն ունեցել է 209, 1914 թ-ին՝ 550, 1922 թ-ին՝ 532, 1959 թ-ին՝ 1029, 1979 թ-ին՝ 894 հայ բնակիչ: Ըստ ազգային վիճակագրական ծառայության տվյալների 2005 թ-ին համայնքի բնակչությունը կազմել է 747 մարդ: Սեռային կազմում տղամարդիկ կազմում են 47%, կանայք՝ 53%:

Ունի դպրոց, գրադարան, ծննդատուն, մանկապարտեզ, կապի հանգույց: Գյուղատնտեսական հողահանդակները գրեթե ամբողջությամբ օգտագործվում են որպես վարելահողեր՝ կազմելով 365հա: Պետական հողերը գլխավորապես օգտագործվում են որպես արոտավայրեր, վարելահողեր՝ կազմելով համապատասխանաբար 303 և 57 հեկտար: Գյուղի մասնագիտացման ուղղությունը երկրագործությունն է: Չբաղվում են դաշտավարությամբ, պտղաբուծությամբ (տանձ, խնձոր, կեռաս), մշակում են հացահատիկային, կերային, բանջարաբուստանային կուլտուրաներ: Չբաղվում են նաեւ խոշոր եղջերավոր անասնաբուծությամբ, մեղվաբուծությամբ:

Համայնքի հիմնախնդիրների մեջ կարելի է համարել դպրոցական գույքի նորացումը, խմելու ջրագծերի վերանորոգումը, գյուղատնտեսական մթերքների իրացումը, գյուղամիջյան ճանապարհների վերանորոգումը: